

MEMORIA XUSTIFICATIVA E ECONÓMICA

CONVENIO DE COLABORACIÓN ENTRE A CONSELLERÍA DO MEDIO RURAL E O CONCELLO DA VEIGA PARA A CREACIÓN DUNHA ESTACIÓN BASE DE PREVENCIÓN E DEFENSA CONTRA OS INCENDIOS FORESTAIS

ANTECEDENTES

A Consellería do Medio Rural, conforme o disposto no Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, é o departamento encargado de xestionar as competencias inherentes ás medidas de prevención e defensa contra os incendios forestais, de acordo co establecido no Estatuto de Autonomía de Galicia, no seu artigo 27, apartado 10, que dispón que lle corresponde á Comunidade Autónoma galega a competencia exclusiva en materia de montes, aproveitamentos forestais e naturais, sen prexuízo do disposto no artigo 149.1.23 da Constitución española.

As entidades locais teñen atribuídas, a teor dos artigos 80 da Lei 5/1997, do 22 de xullo, de administración local de Galicia e 25 da Lei 7/1985, do 2 de abril, reguladora das bases de réxime local, competencias en materia de protección do medio ambiente, protección civil e prevención e extinción de incendios.

A Lei 3/2007, do 9 de abril, de prevención e defensa contra os incendios forestais de Galicia, establece as medidas preventivas que facilitan a loita contra o lume e que sirvan así mesmo para a posta en valor da potencialidade produtiva, ecolóxica e social do monte galego como base do desenvolvemento sustentable do medio rural.

Esta lei establece, no seu artigo 8, que tódalas administracións públicas de Galicia colaborarán entre si e cooperarán nas tarefas de prevención e loita contra os incendios forestais, achegando os medios materiais, económicos e humanos á súa disposición.

Tamén no artigo 59 establece que a Xunta de Galicia colaborará coas entidades locais para a prevención e a extinción de incendios, ben a través de medios propios ben por medio de mecanismos de apoio económico.

OBXECTO DA COLABORACIÓN

Neste contexto de actuacións colaborativas para a prevención e defensa contra os incendios forestais, o concello de A Veiga solicita a colaboración económica para a





construción dunha infraestrutura que constituirá unha estación-base para o dispositivo de loita contra os incendios forestais que opera na contorna nese ámbito territorial.

A necesidade desta infraestrutura ven determinada porque o concello conta con medios contra incendios que operan de xeito permanente (unha brigada de prevención e extinción, dous vehículos motobomba e un tractor), tamén porque este concello é a sede dun GES, grupo de emerxencias supramunicipal, e, de xeito tamén fundamental, pola súa ubicación no territorio.

Ha de terse en conta que A Veiga é o concello máis extenso da provincia de Ourense, conta cunha superficie de 291 km², ten unha riqueza patrimonial moi importante de flora e fauna e, sobre todo, unha masa de arboredo das máis importantes de Galicia.

No que atinxe á prevención e defensa contra os incendios forestais, este concello está localizado entre as zonas sureste e noreste dos Distritos forestais XIII e XIV respectivamente, unha ampla zona do territorio da provincia de Ourense con espazos forestais e zonas de influencia forestal con difíciles comunicacións, de difícil acceso e, por iso, con unha distancia salientable das sedes-base actuais do SPIF da Consellería do Medio Rural.

Compre salientar, así mesmo, que A Veiga, participa mediante colaboración anual co Servizo de Prevención contra incendios forestais da Xunta de Galicia.

En consecuencia, o dispositivo contra incendios forestais que ten base no concello, tanto pola súa importancia como pola súa actuación permanente, precisa de instalacións adecuadas con espazos axeitados, instalacións das que o concello non dispón na actualidade. Este feito obriga ao concello a construír unha infraestrutura que funcione como estación-base permanente e preste servizo tanto para os medios materiais, incluídos os vehículos, para a súa óptima conservación e mantemento, como para os medios humanos, con espazos de traballo adecuados as funcións características deste dispositivo e á normativa aplicable.

Pola súa banda, a Consellería do Medio Rural carece de infraestruturas para o SPIF, servizo de prevención de incendios forestais autonómico, na zona descrita desta Comarca Forestal onde se localiza o concello, o que lle impide ampliar o dispositivo autonómico nesa área, aínda que resulta de especial interese polas razóns expostas respecto das condicións do territorio para facer fronte á loita contra incendios.

Así pois, o uso da instalación municipal permitiría dispor de instalacións adecuadas para o dispositivo do SPIF nesa zona da provincia de Ourense, unha zona de alto risco de incendio, o que favorecería o despregue permanente de medios de prevención e defensa complementarios aos que actualmente teñen sede nos distritos referidos, e por iso devén nunha importante contribución á liña estratéxica que mantén a Consellería do Medio Rural a través da Dirección Xeral de Defensa do Monte, na permanente mellora na prevención e para a redución de tempos de resposta na atención das tarefas e labores de extinción dos incendios forestais.





Tendo en conta que, polo menos, dúas brigadas completas e dous vehículos motobomba do SPIF van dispor de espazo adecuado nesas instalacións durante o longo espazo de tempo, o financiamento a través dunha axuda para a construción de estación-base no concello de A Veiga, que conleva a dispoñibilidade dunha sede para a ampliación da operatividade do dispositivo de prevención e extinción de incendios no territorio definido, resulta de especial interese para os fins vinculados as competencias autonómicas inherentes ás medidas de prevención e defensa contra os incendios forestais en Galicia.

ACREDITACIÓN DO PROCEDEMENTO DE CONCESIÓN DIRECTA

En relación co disposto no artigo 40.2.a) do Decreto 11/2009, do 8 de xaneiro, polo que se aproba o regulamento da Lei 9/2007, de subvencións de Galicia, as razóns que acreditan o interese público, e polo tanto a concesión directa desta axuda, derivan de que a realización do maior número posible de actuacións preventivas é de interese, non só para as administracións asinantes, senón para a cidadanía en xeral, dado que, estas actuacións, contribúen a minorar e mesmo a evitar as consecuencias económicas e ambientais dos incendios forestais; que constitúen unha grave ameaza que afecta hoxe en día, de xeito xeral, non só ao patrimonio dos propietarios particulares forestais e de comunidades de montes veciñais, senón tamén aos recursos naturais e ao mantemento e desenvolvemento da actividade humana no medio rural.

ACTUACIÓN SUBVENCIONABLE E CONTÍA DA AXUDA

A actuación que se subvenciona é a construción dun centro denominado “Estación base de prevención e defensa forestal da Veiga” que estará situado no lugar de A Louseira no Concello da Veiga.

O centro constará dunha zona de estacionamento de vehículos, almacéns de material e de zonas de persoal para os equipos de traballo (sala de descanso, vestiarios, aseos, comedor, sala de reunións, entre outros) independizada para as brigadas forestais da Xunta de Galicia, para as brigadas municipais de prevención e extinción de incendios e para o GES. Outra estancia será para uso municipal de maquinaria menor.

O orzamento estimado para as actuacións que son obxecto deste convenio ascende a 532.500,00 € e a Consellería do Medio Rural financiará, con cargo á aplicación orzamentaria 14.02.551B.760.0 (código de proxecto 2011 00771) dos Orzamentos Xerais da Comunidade Autónoma de Galicia para os anos 2022 e 2023 ata o 70% do investimento co máximo de 372.750,00 €, distribuídos en dúas anualidades:

- 2022: 172.750,00 €
- 2023: 200.000,00 €

A parte correspondente ao concello ascende a 159.750,00 € e será financiada directamente pola entidade local con cargo aos seus respectivos orzamentos.





O convenio recolle a posibilidade de pagamentos anticipados e anticipos a conta coa fin de contribuír a adecuada realización das obras no tempo inicialmente establecido. Este importe, por ámbolos dous conceptos, pode acadar ata o 80% da contía da axuda, aínda que sen exceder da contía prevista para cada anualidade.

COMPATIBILIDADE DE AXUDAS

A axuda concedida mediante este convenio é compatible con calquera outra para a mesma finalidade. Así mesmo, no suposto de que o importe do convenio, illadamente ou en concorrencia con axudas doutras administracións públicas ou privadas, supere o total do custo da actividade, procederase ao reintegro do exceso percibido.

DISPOÑIBILIDADE DE USO DA ESTACIÓN-BASE POLO SPIF

O convenio prevé que o Concello de A Veiga disporá nesta infraestrutura de espazo adecuado para os medios do SPIF que a Consellería do Medio Rural destine a esa base poderán facer uso da mesma.

Neste senso, a Xunta de Galicia contará con espazo diferenciado e destinado para os medios do SPIF en óptimas condicións para o seu uso durante 20 anos ininterrompidamente desde o acto de recepción. Non obstante, unha vez transcorridos os primeiros dez anos de funcionamento da base, ámbalas dúas partes poderán de mutuo acordo revisar o uso das instalacións e adoptar os pertinentes acordos para eses efectos.

Unha vez que a base estea operativa, o SPIF destinará nesa contorna, como mínimo, dúas brigadas completas e dous vehículos motobomba, o que supón un incremento dotacional esencial para completar a cobertura nesa Comarca Forestal, en liña coa estratexia da Consellería do Medio Rural e definida no Pladiga, de ampliar os recursos de loita contra os incendios forestais, especialmente nas zonas de alto risco, atendendo ao obxectivo principal de concentrar esforzos e optimizar os recursos para intensificar as actuacións preventivas que impidan ou minoren o risco e, ao mesmo tempo, poder realizar intervencións rápidas nas labores de extinción que permitan a redución da intensidade dos incendios e as súas consecuencias.

Santiago de Compostela, coa data da sinatura electrónica

O director xeral de Defensa do Monte
Manuel Rodríguez Vázquez

